

重修伊陽縣志卷之五

知縣湖南清泉張道超輯

藝文志

藝文之爲用也可以觀民風攬山川考興廢鑒政治之得失卽史傳亦足是正焉或謂爲末節而畧之無亦目論也
歟志藝文

唐

峴山寺普光法堂前石燈臺之頌銘

並序

呂芝

東平

夫輪王口法不憚亡軀菩薩祈師寧辭割命旣剗身千處次第

燃燈亦捨臂一雙從頭熬火以彼賢聖行此法而誘羣迷令我
凡夫各標心而求解脫驗生前而恭塔廟卽滅後而證菩提知
現在而奉經文必當來而成正覺將今况古自昔常然以聖化
凡其來久矣言燈臺者乃是寺主道津之所建也本望誰郡族
姓夏侯汝南處士之孫峴北名家之子唐唐父叔山水英髦濟
濟弟兄鄉閭標袖然則幼閑經業早沐皇恩應佛教而頽簪感
天刀而落髮欽承睿旨作汝海之名僧積習玄風成峴山之太
德歷兩員之綱紀攝三寶之住持開六度之法門播四生之佛
種不意俄侵白首運屬衰年卒染纏痼彌加委憊當憂性命脆

若浮泡自念形骸危如累卵仍遭三鼠競齧枯藤鎮被四蛇爭
鑽□□□偷電火豈保須臾假竊石光難留瞬息銜悲發露諸
佛冥加灑淚求哀□祇護念安得權教扁鵲醫澍神湯密遺耆
婆陰施妙藥醫方善巧潛消骨髓之癥禁術奇能盜破膏肓之
疾神情爽□□□□之辰氣色恬和復似盛年之日承佛威
而免死特表虔誠□法力而延生孤標勝福先□□□□良
工□□□財方令制作求千金之美石就山頂而穿來□七寶
之華臺當寺中而湧出平□□□□五層□天地之方圓絕
古今之巧妙重□蓮葉向日芬芳迥起珠樓臨空赫奕乘六牙

之象背獻百味之香油對三藏之經前燃一心之慧炬烟光乍
散變作雲飛火色新驚翻成月落十方普照福利恒沙五口日
明殃口口劫微塵口口咸開般若之光法界含靈盡破無明之
業夫功成運謝德立時遷遂刻石銘將傳不朽其詞曰華臺涌
出寶堂前心上燒燈獻法筵一道長明過有頂十方遠照匝無
邊烟光口起三乘教火色熏修百福田汲引羣生超苦海當口
累劫化口天天寶十載歲次辛卯正月乙酉朔廿九日癸丑

阿彌陀像記

景龍三年歲次己酉四月丁亥朔十五日辛丑 聞如來

正教潤益含靈濟渡羣生皆超彼岸然今弟子楊敬澄爲身染
時患具無常峻速遂割捨家資敬造阿彌陀像一鋪今以成就
缺

唐故朝議大夫上柱國澧州司馬魏府君墓誌銘

并序

闕名氏

公諱體元其先鉅鹿彭城人也屬隋失金鏡避地於懷金爲獲
嘉縣人焉溯夫開天闢地有人倫焉爲帝爲王建宗族焉故畢
受賜於周萬保封於晉大夫列位肇得姓焉其後魏顓行恩幽
冥報德魏舒入伯爵祿承家赫奕衣冠光於史冊曾祖景通北

齊召補秘書郎學富心臺義晶秘閣左太冲之作賦喜拜此官
劉大連之有守先充斯位轉祠部郎中天分列宿位重舍忝議
奏草於清臺握芳蘭於朱陛以家代闕閱遷龍驤將軍符堅佐
主非無感夢之徵王濟世臣自有重謠之應祖裕隋方州太舍
縣令靈州司馬隴州刺史多材多藝乃武乃文忠肅振於朝廷
仁恩歌於郡縣父綱皇朝杭州餘杭縣尉謙謙君子溫溫淑賢
學以潤身卑以自牧安排北部枉我廊廟之材守道南昌屈我
神仙之職轉太州鄭縣主簿昔爲孝子今爲人臣舉善不避仇
讐退惡不以親戚有伯玉之節有王允之威轉晉州洪洞縣丞

滑州曲阿虢州宏農二縣令撫字多方清勤兩著一百里之作
令六百石之秩丞廉以飭躬胡紹之臨河內善以御衆黃霸之
在河東公稟天地之精膺川岳之靈量包江海吸雲霞而浩浩
操堅松竹衝歲暮而青青其言也博達其鑒也淵微商權九經
兼并四部衣冠爲之無口口樂爲之中興皇朝明經擢第解褐
授楚州司法參軍江淮設險狡猾成風折獄無才狴牢有滯公
之任也朝誨之以修德夜泣之以受辜黎庶感恩囹圄空厥轉
豫州西平縣令汴州司倉參軍荆河南控蓬池北臨俗號神明
人知禮節遷滑州韋城縣令澧州司馬滔滔澧水淙丹峽之波

瀾鬱鬱滑臺罩星躔之光彩公佐百城之闡化王仲父之精勤
蓄三異而當官魯仲康之政教嗚呼風火不駐生死何常賈太
傳之有言鄭司農之興嘆以景龍二年夏四月卒於鄧州向城
縣清陽郡逆旅春秋七十有二夫人趙郡李氏贊皇縣君配於
君子事於舅姑服於澣濯躬於紡績陶氏之母截髮馳名孟氏
之親大衾存教仁矣命矣天乎神乎以神龍二年春正月廿九
日終於內寢春秋七十以景龍三年之十月十一日合葬於汝
州西南紫邏山懷吉村西平原之祖地嗣子觀吏部候選哀哀
父母鞠兮育兮杳杳原肩永矣遺矣心骨崩碎叩地號天痛哉

月之若流懼邱陵之遷貿敢鐫荆璞用紀松扉嗚呼哀哉廼爲
銘曰西域聖人兮涅槃偈東魯夫子兮太山歌生兮生兮旣不
保死兮死兮知奈何武擔兮石坂陽臺兮雲斷銘琬口兮哀哉
畢乾以兮清短

進知銓事宋舍人昱書

劉廙

昔禹稷臯陶之聖猶曰載采有九德考績以九載今有司獨委
一二小宰察言於一幅之判觀行於一揖之內何其易哉夫判
者以狹詞短韻爲體雖有周公尼父圖書易象之訓以判責之
曾不及徐庾雖有至德以喋喋取之曾不若嗇夫執事誠能先

政事次文學退觀其治家進察其臨節則龐鴻深沈之事亦可
窺其門閥矣

與伊陽掌故無涉
以舊志刊載存之

宋

明道先生追封河南伯制詞

勅明道初元天於河南篤生大賢是似顏子故任左丞議郎宗
正寺丞諡純程顥德性粹甚天理渾然由明而誠有過化存神
之妙自體達用有綏來動和之功使得相於熙寧蒼生之福未
艾朕每追惜之然誦其遺書如有用我朞月而可眞足以開萬
世之太平也爰躋從祀仍錫追封以示褒崇以勸來者可特封

河南伯餘如故

伊川先生追封伊陽伯制詞

勅明道二年天於河南挺生儒宗是似曾子故任左通直郎崇政殿說書贈朝議大夫直龍圖閣謚正程頤直內方外智崇禮卑物格知至則由體驗之功任重道遠則自特守之固發明六藝辭嚴義密怡然理順渙然水釋豈獨天下之士受先覺之賜朕萬機之暇垂意經術所藉以緝熙多矣爰躋從祀仍錫追封以示褒崇以勸來者可特封伊陽伯餘如故淳祐元年

程明道贊

朱熹

存陽集卷三
場休山立玉色金聲元氣之會渾然天成瑞日祥雲和風甘雨
龍德正中厥施斯普

程伊川贊

規圓矩方繩直準平允矣君子展也大成布帛之文菽粟之味
知德者希孰識其貴

忠孝碑贊

文天祥

凡厥細民猶知供賦稅出力役以事一人矧士之讀書行義享
爵祿而被榮寵者寧忍自私其身念作成養育莫非君恩庶幾
竭心圖報而不愧乎爲臣

事親之道不遠於身知己之所以愛吾子則知所以愛吾親惟養生與送死在致勞而服勤必順乎親斯可爲人世有愛親不若愛子者是之謂悖天逆倫

魁星圖贊

繫乎紫薇垣之旁爲星之魁書乎進士第一之堂爲字之魁捷平庚午之秋爲解之魁占乎辛未之春爲省之魁齊美乎丙辰之狀元爲天下之大魁悟魁之義得魁之氣文明之魁車載斗量不可勝計爾酒旣清爾肴旣馨惟吾魁其光賁其炳靈

汝州峴山乾明禪院住持明師預建塔銘 李芬

隴西

紹聖四年秋北邱廣賢爲其先師之法眷弟義明捨所售用與其衣鉢所有爲錢十萬卽其山巔之西南去院逾口百步喬木千章佳城鬱鬱卜兆得吉遂穴其地陶甃而周之以爲明異日歸塋之所斲石爲塔而立之以爲塋所異日之識狀厥事而乞銘於予以爲所識之傳謹按師名義明俗姓王氏世爲龍興人生有異相志趣不凡長樂法門經業早就二十歲禮峴山乾明禪院主志岳和尚爲師後五年試優剌落師爲人質直無僞損己利他綽有材能力省功倍粵自受戒卽列知事峴山連峯跨嶺周百餘里前此林木障蔽荆棘荒涼墾闢未施租人不腆佛

寺僧居與夫齋粥供用一切苟簡自師主之則親斧斤耒耜之
定經界隴畝之制招徠疲甿勸課地方無幾何而功利數十
百倍昔之林木障蔽變而爲膏腴昔之荆棘荒涼易而爲衍沃
若奉佛之殿演法之堂居僧之舍延賓之館方丈之室香積之
廚鐘之樓門之三高明雄傑深靖溫涼與時而宜與用而稱龍
象森列魚鰕闌奏食指日千有羨餘而無不足四方仰給而來
者人滿所欲師衣糗食糲泊焉遺形骸外財利未嘗有毫髮介
意亦未嘗私於己常曰身非我有烏用利生非我欲烏用名數
盡卽行了無一物嗚呼所謂空門依歸法王種子捨師而誰廣

賢聞宗旨之微言敦眷屬之妙契求文宰堵成師志也住持今
十有二年今度弟子十一人曰廣元廣隆廣詮廣善廣嵩廣宗
廣修廣希廣完廣吉廣文若乃寂滅之年僧臘之數當在異日
補其闕文詞曰南北異派禪律同源甘露醍醐一味孰分良金
大圭珍瓊俱存切身爲有易闕厥藩觀心如幻直入其門維道
人明絕醜離羣經論淵微宗風秘邃說最上乘示第一義法海
浩浩津梁斯濟智燈煌煌薪膏不匱上下虛空不可思議維道
人明了達超詣境絕地勝峴山巖巖屯雲陰壑倚天晴嵐長林
朽枿荒棘餘芟嘉生得產窮口日潛斧斤耒耜乃躬乃監維道

人明身瘡力兼功利事興崇飾塔廟殿宇樓觀金碧煜燿龍象
森列闡揚讚導四衆仰給飢病□□有大醫王藥食救療維道
人明餘光普照私乃公害利令智迷生死永昧輪回莫知租入
供用毫髮不欺泊焉宴□糲食弊衣眷屬懷感宰堵紀碑維道
人明我無媿辭紹聖戊寅四月十日

元

封程顥豫國公詔

三千之徒莫先顏氏瞻言往昔式克似之故河南伯程顥體備
至和躬承絕學元氣之會鍾於獨得聖人之道賴以復明翳百